

Bosna i Hercegovina  
Federacija Bosne i Hercegovine  
Tuzlanski kanton  
**GRAD TUZLA**  
**Služba za kulturu, sport, mlade  
i socijalnu zaštitu**  
Broj: 17-11-A-16532/2024  
Tuzla, 23.10.2024. godine

Na osnovu člana 4. Pravilnika o načinu raspodjele finansijskih sredstava iz Budžeta Grada Tuzle medijskim subjektima („Službeni glasnik Grada Tuzla“, broj: 5/20) i Programa utroška sredstava iz Budžeta Grada Tuzle za 2024. godinu sa pozicije „Grantovi za medije, broj: 17-510/24 od 18.10.2024. godine, Služba za kulturu, sport, mlade i socijalnu zaštitu, dana 23.10.2024. godine, objavljuje:

**JAVNI POZIV**  
**za dodjelu finansijskih sredstava iz Budžeta Grada Tuzle za 2024. godinu**  
**sa pozicije „Grantovi za medije“**

**I - Predmet Javnog poziva**

Predmet Javnog poziva je dodjela sredstava iz Budžeta Grada Tuzle za 2024. godinu medijskim subjektima sa područja grada Tuzle koji obavljaju medijsku djelatnost, odnosno proizvode i distribuiraju program putem različitih tehnoloških platformi – štampe, radija, televizije i interneta. U Budžetu Grada Tuzle za 2024. godinu, na poziciji „Grantovi za medije“ obezbjeđena su finansijska sredstva u iznosu od 60.000,00 KM namijenjena za podršku medijskim subjektima s područja grada Tuzle.

**II - Pravo učešća**

Pravo na dodjelu finansijskih sredstava imaju poslovni subjekti registrovani kao pravna ili fizička lica koji obavljaju medijsku djelatnost odnosno proizvode i distribuiraju program putem različitih tehnoloških platformi – štampe, radija, televizije i interneta (u daljem tekstu: aplikanti), a koji ispunjavaju sljedeće uslove:

- imaju sjedište i registrovani su na području grada Tuzle,
- raspolazu kadrovskim potencijalima za informisanje građana,
- imaju izmirene zakonske obaveze po osnovu javnih prihoda.

U procesu odabira i ocjenjivanja, prednost će imati aplikanti:

- koji u planovima programskih sadržaja imaju obuhvaćeno praćenje aktivnosti, Gradskog vijeća, Gradonačelnika i gradskih službi Grada Tuzle,
- koji su u prethodnom periodu izvještavali o aktivnostima Gradskog vijeća, Gradonačelnika i gradskih službi Grada Tuzle.

U raspodjeli sredstava po ovom Javnom pozivu ne mogu učestvovati poslovni subjekti registrovani kao javna preduzeća (javni medijski servisi) čiji je osnivač bilo koji nivo vlasti u Bosni i Hercegovini.

**III - Način prijavljivanja**

Prijava na Javni poziv podnosi se na propisanom prijavnom obrascu koji se može preuzeti na zvaničnoj internet stranici Grada Tuzle ([grad.tuzla.ba](http://grad.tuzla.ba)).

Uz popunjen prijavni obrazac aplikanti su obavezni dostaviti:

1. Rješenje o registraciji (ovjerena fotokopija),
2. Identifikacioni broj (fotokopija),

3. Ličnu kartu lica ovlaštenog za zastupanje (fotokopija),
4. Zvaničan dokument banke o otvaranju transakcijskog računa aplikanta (fotokopija),
5. Uvjerenje o izmirenim obavezama prema javnim prihodima (original ili ovjerena fotokopija iz Porezne uprave, ne starije od 30 dana od dana objave janog poziva),
6. Završni godišnji finansijski izvještaj za prethodnu godinu (bilans stanja i izvještaj o prihodima i rashodima) za pravna lica ili godišnju prijavu poreza na dohodak za fizička lica (fotokopija),
7. Dokaz iz Porezne uprave o broju uposlenih ili Izjavu vlasnika medija o broju uposlenika,
8. Opisni izvještaj o realizovanim uslugama po javnom pozivu u prethodnoj godini,
9. Kraći opis medija (vrsta, način rada, programska usmjerenja i kratke biografije aktivno angažovanih novinara),
10. Relevantan dokaz o rezultatima ispitivanja uticaja medija (gledanost/slušanost/čitanošć/posjećenost) u prethodnoj godini (ovaj dokaz nije eliminatoran ali je relevantan za bodovanje).

Prijave na javni poziv koje ne zadovoljavaju bilo koji od ispod navedenih kriterija neće se uzeti u razmatranje:

- nisu dostavljene u naznačenom roku,
- nisu potpune ili ne sadržavaju validnu dokumentaciju,
- aplikanti nisu opravdali namjenski utrošak sredstava dodijeljenih iz Budžeta Grada Tuzle u prethodnoj godini,
- aplikanti nisu dostavili narativni i finansijski izvještaj te dokaz o namjenskom utrošku sredstava odobrenih iz Budžeta Grada Tuzle za prethodnu godinu,
- aplikanti nisu izmirili obaveze prema javnim prihodima,
- nije u potpunosti popunjen prijavni obrazac.

#### **IV - Osnovni kriteriji odabira**

Osnovni kriteriji odabira propisani su odredbama Pravilnika o načinu raspodjele finansijskih sredstava iz Budžeta Grada Tuzle medijskim subjektima („Službeni glasnik Grada Tuzla“, broj: 5/20) i Programom utroška sredstava iz Budžeta Grada Tuzle za 2024. godinu sa pozicije „Grantovi za medije, broj: 17-510/24 od 18.10.2024. godine.

Minimalan iznos sredstava za dodjelu po jednoj aplikaciji je 1.000,00 KM a maksimalan 15.000,00 KM. Visina sredstva za dodjelu će se određivati u skladu utvrđenim brojem bodova za aplikaciju prema sljedećem okvirnom rasponu:

<b>Broj bodova</b>	<b>Iznos sredstava za dodjelu</b>
36 - 42	1.000,00 – 3.000,00
43 – 49	3.000,00 – 6.000,00
50 – 56	6.000,00 – 9.000,00
57 – 63	9.000,00 – 12.000,00
64 - 70	12.000,00 – 15.000,00

Visina sredstava za dodjelu bit će cijenjena u svakom pojedinačnom slučaju uzimajući u obzir ukupnu vrijednost predložene aplikacije, traženi iznos sredstava iz Budžeta Grada Tuzle kao i iznos raspoloživih sredstava za dodjelu u odnosu na broj aplikacija koje zadovolje propisane kriterije. Shodno tome, maksimalni iznos sredstava za dodjelu može biti umanjen u cilju podrške svih aplikanata koji zadovolje uslove javnog poziva. Sredstva u maksimalnom rasponu (12.000,00 do 15.000,00) mogu ostvariti samo medijski subjekti koji plasiraju sadržaj putem više tehnoloških platformi (radio, televizija, internet portal i sl.).

#### **V - Mjesto i rok za dostavu prijava na javni poziv**

Prijave na Javni poziv sa pratećom dokumentacijom dostavljaju se u zatvorenoj koverti, preporučenom poštom ili predaju lično putem Centra za pružanje usluga građanima (šalter sala) na adresu:

**GRAD TUZLA**  
**Služba za kulturu, sport, mlade i socijalnu zaštitu**  
**Ulica ZAVNOBIH-a broj 11**  
**75000 Tuzla**

**Uz obaveznu naznaku:**  
**„Javni poziv za dodjelu finansijskih sredstava iz Budžeta Grada Tuzle za 2024. godinu**  
**sa pozicije „Grantovi za medije“**  
**- Ne otvarati“**

Javni poziv ostaje otvoren 15 (petnaest) dana od dana objavljivanja, a **krajnji rok za predaju aplikacija je 7.11.2024. godine**. Aplikacije koje budu pristigle poslije navedenog roka razmatraće se jedino u slučaju da poštanski žig ukazuje na datum slanja prije zvaničnog isteka roka. Aplikacije poslane na bilo koji drugi način (npr. faksom ili e-mailom) neće biti uzete u razmatranje.

**VI - Način objavljivanja rezultata i dodatne informacije**

Nakon završenog postupka odabira na zvaničnoj internet stranici Grada Tuzle ([grad.tuzla.ba](http://grad.tuzla.ba)) bit će objavljena Lista o odabiru aplikacija koja će sadržavati odabrane aplikante kao i aplikante koji nisu ispunili uslove javnog poziva sa naznakom koji uslov nije ispunjen.

Sve dodatne informacije o načinu i postupku učešća u Javnom pozivu, mogu se dobiti u Službi za kulturu, sport, mlade i socijalnu zaštitu Grada Tuzle putem telefona: 035 307 327 ili slanjem pitanja na e-mail adresu: [asja@tuzla.ba](mailto:asja@tuzla.ba) sa naznakom „Javni poziv za medije“.

**Služba za kulturu, sport, mlade**  
**i socijalnu zaštitu**